



Trabounan ta andando pa completa tur detaye paden y pafo di MFA Noord

SU arkitektura moderno y e tamaño di e edificio riba su mes ta capta atencion di tur cu pasa cerca di crusada principal na Noord.

Prome cu mitar di aña, e edificio lo ta den operacion y brindando servicicionan di custumber di Hulpbestuurkantoor, ademas di varios otro nobo na comunidad di Noord y becindario. E vision tras di e tipo di facilidadnan aki ta pa trece ciudadanonan di barío hopi mas serca di otro y duna nan e facilidad pa varios actividad necesario manera Biblioteca, oficina di AZV, localnan di computer, pa practica musica, baile y mucho mas.

E ultimo detayenan di e facilidad di Noord ta trahando riba dje aworaki den preparacion pa cuminsa opera e facilidad.

Director di MFA Noord, sr. Richard Tromp, a comparti e avancen mas reciente.

Mientras cu construccion ta den su fasenan final, directiva ta sigui enfoca riba e servicicionan cu ta bay forma parti di su interior.

N'esey ta aña di e entrenamiento di personal di Hulpbestuurkantoor, como tambe e area rond di e edificio, cu tambe mester sirbi como lugar di encuentro pa habitantenan di e barío.

Pronto ta bay anuncia: 'Anochinan Informativo' p'asina actualisa e ciudadano riba desaroyo di e proyecto, con a incorpora e sugerencianan haci den sesionnan anterior y kico por haci ainda.

E involucmento di e comunidad di Noord no ta caba ey, pasobra MFA tambe ta ehecutando un competencia mey-mey di e scolnan basico den

e distrito pa bin cu e mihor nomber posibel p'e edificio.

Studentenan di klas 5 y 6 di mayoria scol publico y priva, ta participando y na final, MFA hunto cu Instituto di Cultura ta bay scoge esun cu mihor ta refleha e identidad historico y cultural di e barío di Noord.

Tambe e organisacion y departamentonan di servicio publico, ta preparando nan mes pa drenta e edificio di MFA y cuminsa opera.

Biblioteca Nacional y AZV ta algun di esnan cu lo ta na disposicion y ta importante pa nan presencia y productonan ta cuadra cu e concepto moderno y practico di e lugar.

Servicio di 5 strea pa cada persona t'e meta principal, y den e cuadro ey, ta busca pa tur empleado, incluyendo esnan, di Hulpbestuurkantoor, traha di un manera proactivo y profesional.

Na mesun momento cu MFA Noord ta yegando na fase final, construccion pa MFA Paradera a inicia y tambe ta spera cu ta keda cla p'e aña aki. Hunto cu Santa Cruz, Savaneta y San Nicolas, e 5 facilidad multifuncional ta bay hisa e calidad di bida di e ciudadano rond di Aruba, ofreciendo e capacidad di por atende mas tanto asunto serca di nan cas.

Otro obhetivo importante ta cu cada edificio ta sirbi como punto di encuentro y trabou pa organisacion y gruponan di e barío, como tambe di interaccion social y manifestacion cultural y artistico pa su ciudadnonan.